

Estadu kondekora Bernard Collaery ho Ordem Colar Timor-Leste



Advogadu Internasionál Bernard Collaery. Imajen Tatoli/Francisco Sony

DILI, 20 maiu 2023 (TATOLI)—Prezidente Repúblika Timor-Leste, José Ramos Horta, fó prémiu no medalla méritu ba ema nasional no internasionál na'in-108 ne'ebé fó sira-nia kontribuisaun no dedikasaun ba nasaun Timor-Leste, inklui kondekora Bernard Collaery ho Ordem Colar Timor-Leste.

Ramos Horta hateten ohin loron, Estadu fó omenajen ba Timor-oan no belun sira hosi nasaun oioin, ne'ebé kontribui iha tempu uluk no impoin iha dalan oioin.

“Ami rekoñese ona kolega estranjeiru barak hosi nasaun oioin hanesan Austrália no Portugal. Sira-nia dedikasaun maka'as ba apoiu povu Timor-Leste iha forma oioin. Sidadaun Austrália ida “Bernard Collaery” ne'ebé dedika nia moris tomak ba timoroan sira no nia luta makaas tebes ba sakrifisiu isin no raan ne'ebé folin boot tebes,” Xefe Estadu, José Ramos Horta hateten iha ninia diskursu, iha Palasiu Nobre Lahane, sesta ne'e.

Prezidente Repúblika, Jose Ramos Horta, fó medalla orden colar Timor-Lesyte ba Bernard Collaery nu'udar eroi ida-ne'ebé loos ba povu Timor-Leste.

Advogadu Internasionál, Bernard Collaery hateten prémiu boot tebes atu hetan medalla méritu hosi Prezidente Repúblika Jose Ramos Horta.

“Ha'u hetan omenajen ba povu Timor-oan no ha'u iha ne'e la'ós de'it ba povu ne'ebé ha'u hadomi. Ita-nia nasaun iha ha'u-nia raan tanba ha'u mak belun ida husi ita-nia nasaun,” nia dehan.

Collaery hateten, nia apoiu Timor-Leste durante metade iha nia moris no nia mós aprende kona-ba Timor-Leste dezde tinan 22, nune'e nia tinan 78 no kompromete atu dedika nia moris tomak hodi ajuda ema timoroan sira.

Dekretu-Lei No. 15/2009, loron 18 fulan-marsu, atu rekonese no agradese ba povu Nasionál no internasionál ne'ebé serve nasaun Timor-Leste, hodi fó apoiu ba orden Sosiál.

Tanba ne'e, Prezidente Repúblika fó prémiu ba ema na'in-108 nasional no internasionál ho tipu haat ne'ebé kompostu hosi medalla orden Timor-Leste nian, medalla Insensu no Merit, no sertifikadu rekuperasaun ba individuál oioin ne'ebé ema na'in-16 ne'ebé hetan medalla klase Collar, medalla na'in-42, medalla klase 13, méritu na'in -35 no ema na'in-2 ne'ebé hetan ona apresiasaun no total ema na'in-108.

Tanba, medalla ne'e mós sai nu'udar simbollu agradesimentu ba povu Nasionál no internasionál sira, hosi parte oioin iha mundu, ne'ebé hala'o papél ativu iha dezentvolvimentu Timor-Leste.

Kada 20 maiu, tinan-tinan, Prezidente Republika sempre fó medalla méritu ba povu lokal no internasionál, ne'ebé dedika an ba Timor-Leste.